

## TORITENY - ALAHADY faha-24 TSOTRA - TAONA D



### *Hisy hafaliana lehibe any an-danitra amin'ny mpanota iray mibebeka*

Ry kristianina havana, raha Alahady maromaro izay no nandalinantsika sy nibanjinantsika fa raha te ho anisan'ny fianakaviamben'Andriamanitra, raha te ho oloaraiky ao amin'ny Trinite masina dia tsy maintsy miditra amin'ny varavarana tery, tsy maintsy misy fahafoizana. Tsy mandeha ho azy ny finoana, tsy tany malemy anorenam-pangady fa tany lonaka hiasan'ny fahasovan'Andriamanitra izay tsy maintsy varavarana hety satria safidy no ataontsika ka mila fahafoizana. Tsy azo atao ny misabaka ka mitaky toe-panahy izany fahafoizana izany, mila fanetren-tena sy halemem-panahy. Misy fotoana tokoa mila ho kivy isika ka amin'izao Alahady faha-24 mandavantaona izao dia asongadin'ireo vakiteny amintsika fa Ray aman-dReny tsy mahafofy zanaka Andriamanitra. Isika no be siasia ka te handeha amin'ny varavarana malalaka any amin'ny fahaverezana ka manadino

an'Andriamanitra fa izy kosa Ray be famindram-po. Amin'izao taona masina izao dia izay no averimberin'ny Papa Ray masina amintsika. Raha nihaona tamin'ny tanora tao Cracovie izy dia nilaza fa ny "Famindram-po dia tanora mandrakariva ary mibanjina ny hoavy izay tsara mandrakariva" ka ny tadiavin'Andriamanitra dia isika hiverina aminy, hanokatra ny fontsika aminy, hitoetra eo an-tongotr'i

**Vakiteny I :** Eks. 32, 7-11. 13-14

**Salamo :** Sal. 50

**Vakiteny II :** 1 Tim. 1, 12-17

**Evanjely :** Lk. 15, 1-32

Jesoa, hihaino ary handray ny fahendren'Andriamanitra.

Izany tokoa ry Krisitianina havana no matetika mahatonga atsika very lalana satria isika tsy mihaino an'i Jesoa, tsy manokatra ny fontsika amin'ny famindrampon'Andriamanitra, tsy mandray ny fampianaran'i Jesoa fa mirona amin'ny fampianarana izay mahatonga atsika very fanahy mbola velona ka tsy mahita intsony ny lalan-kombana. Izay no mitranga araka ny voatantara ao amin'ny bokin'ny Eksaody (*Eks. 32, 7-11. 13-14*) : varimbariana tamin'ny fanaovana sarin' omby natao sampy ny vahoaka ka io no nivavahana. Matetika isika, toy izay mandray ny tenin'Andriamanitra sy manompo azy sy mandray ny tenin'i Jesoa dia varimbariana manompo sampy izany hoe mahita Andriamanitra hafa izay an'izao tontolo izao dia tsy inona fa ny vola, ny voninahitra sy ny vokatr'izay rehetra izay. Fantantsika koa ny tena vokatry ny fitadiavana vola, ny fitiavan-tena dia ny fahalavoana amin'ny herisetra sy ny lainga ary fitapitaka. Izany koa ny fakam-panahy nanjo an'ireo vahoaka tany an'efitra na dia nananatra aza Andriamanitra dia vahoaka mafy atoka izy ireo. Matetika tsy mitsahatra ny mpaminany, ny Eglizy mampianatra sy manoro lalana atsika satria Reny ny Eglizy no mpaminany manambara ny sitrak'Andriamanitra amintsika tahaka nataon'i Moizy tany an'efitra fa ny vahoaka no mafy atoka izany hoe ny sitrapontsika ihany no tiantsika ampiharina. Io koa no niseho tamin'ny fanoharana nataon'i Jesoa enontsika tamin'ny Evanjely (*Lk. 15, 1-32*), fanoharan'ny zaza mpandany izay **tahaka antsika tokoa mandany ny fahasoavan'Andriamanitra amin'ny tsy mety, potehintsika amin'ny tsy misy antony ny fiainantsika ka potika ny fontsika, vokatr'izay dia potehintsika ny fifandraisantsika amin'Andriamanitra sy amin'ireo manodidina atsika. Andriamanitra anefa Ray be famindram-po, tsy mba mamitaka izy. Rehefa nitia hatramin'ny voalohany izy nahary atsika hitovy endrika aminy dia miandry ny fiverenantsika izy. Ny tena mahavariana arak'io fanoharana io dia Andriamanitra indray ilay Ray no faly raha niverina ny zanaka mpandany.**

Ry Kristianina havana, izany no fankaherezana ho atsika, na dia manao akory ny fiainantsika, na dia lavo ao anatin'ny fahendren'izao tontolo izao isika tahaka an'ilay zaza mpandany dia mandray atsika tokoa Andriamanitra anatin'ny hafaliana raha miverina isika ary izy no mikarakara atsika. Izany ny ampianariny atsika raha izy milaza amin'ny mpanampy : "Kiraroy ny tongony" Tsy iza ny mpanampy eto fa ny Eglizy, isika Kristianina, milaza amintsika Andriamanitra sy amin'ireo manodidina atsika fa tsy maintsy manana famindram-po isika, tsy maintsy manome hasina an'ireo manodidina atsika satria samy mpanota tsy mendrika isika ka mifanome hasina izay ny dikany "Asio kiraro ny tongony, asio peratra ny tanany, maty ity zanako ity ka velona indray". Isika izany no mamelona an'ireo manodidina atsika, manome hasina ao anatin'ny fifanajana. Marina fa eo ny mpialona izay misy eo akaikintsika tahaka an'ilay rahalahy zokin'ilay zaza mpandany voalaza ao amin'ny Evanjely, fantantsika anefa ny anatra nataon'ny Ray : **"Eto amiko mandrakariva ianareo ka anareo ny zavatra rehetra" izany hoe raha ao amin'ny Eglizy isika dia miombona mandrakariva amin'Andriamanitra. Izay no vaovao mahafaly amin'izao Alahady faha-24 mandavantaona izao.**

**Aoka ary isika hivelona an'izay famindrampon'Andriamanitra izay : hifanaja isika ary hifanome hasina ka ho feno hafaliana mandrakariva ny fiainantsika araky ny fanoharana amin'ny Evanjely io.**

Nisy olona anankiray nanao an'izay "expérience" izay ka tantarainy amintsika amin'izao Alahady faha-24 izao tsy iza izany fa i Md Paoly mitantara ny zavatra niainany amin'ny taratasy nosoratany ho an'ny Timote ( 1 Tim. 1, 12-17 ) : *" Dia izaho izay mpiteny ratsy fahiny, sady mpanenjika sy mpanao an-keriny; kanefa nahazo famindram-po aho, satria tsy fahalalana no nanaovako izany, noho izaho tsy mbola nanam-pinoana; fa nony nombàn'ny finoana amim-pitiavana izay ao amin'i Kristy Jesoa, dia nihoa-pampana ny fahasoavan'ny Tompontosika."*

Mihoam-pampana ny fahasoavan'Andriamanitra taminy hoy izy ka na dia tsy mendrika itokisana aza izy dia tao amin'i Kristy no nandray ny fahasoavan'Andriamanitra ka tonga apostoly ary dia mananatra an'i Timote izy.

Ry Kristianina havana mananatra atsika i Md Paoly hatoky an'izay famindrampon'Andriamanitra izay satria isika no be siasia, isika no mafy atoka fa Andriamanitra kosa tsy miova amin'ny fitiavany izy ary tsy mahafofy ka vonona hikarakara hanasoa atsika ka isika samy isika koa aoka hifampikarakara, hifanasoa, hifanombo mba ho ao amin'ny hafalian'Andriamanitra isika.

Ry Jesoa Kristy Tompo ô, amin'izao Alahady faha-24 mandavantaona izao, mazava ny fampianaranao anay. Ray Andriamanitra ary tsy lavitra izy fa Ray tena tsara fo, be famindram-po ary dia vonona handray anay mandrakariva. Ny fonao no mampibaribary an'izay famindrampon'Andriamanitra izay, ianao no endriky ny famindrampon'Andriamanitra. Koa enga anie izahay hahay hifandray koa ka hahay handray ny namanay izahay, hanana an'izay famindram-po izay izahay ka hifanao soa sy hifanatsara ary indrindra hifanome hasina ka hanome izay soa ho an'ireo namanay fa indrindra ireo voahilikilika, amin'izay dia hiadam-pinaritra ao aminao izahay ka ho feno hafaliana ny fiainanay ary handray izany hafaliana avy aminao izany izahay. Amen

Mompera Arseveka Mgr Benjamin Ramaroson